



Ioseph & Marie portent Iesus-Christ en Egypte, evitant la fureur d'Herodes qui le cherchoit pour mettre à mort.

A PRES que les Sages qui estoient venus d'Orient, & qui auoient adoré Iesus-Christ, se furent seurement retirez en leurs contrées, voicy l'Ange du Seigneur qui s'apparut par songe à Ioseph, luy disant; Leue toy, & prens le petit enfant Iesus & sa Mere, & le porte en Egypte, & t'enfuit, & soit là iusques à ce que ie te le die, car Herodes cherchera le petit enfant pour le mettre à mort. Ioseph donc estant éveillé, prit de nuit le petit enfant & sa mere, & se retira en Egypte, & fut là iusques au trépas d'Herodes, afin que fut accompli ce que le Seigneur auoit dit par le Prophete, disant; J'ay appelé mon fils hors d'Egypte. Quant aux travaux & fatigues qu'ils eurent faisans ce perilleux voyage, nous n'en pouuons rien tirer des saintes lettres, encore moins des miracles qui y furent faits. Toutesfois il est à presuposer, que ce ne fust sans l'assistance des Anges celestes: Aussi plusieurs Autheurs témoignent que les Oracles des Payens cessèrent alors, & que les Idoles & simulachres adorez par les Egyptiens tomberent bas. Au reste, nous pouuons bien penser que la Vierge Marie se voyant exilée de son pays, ne fut pas sans extrême regret, joint la peur continuelle qu'elle auoit des meurtriers qu'Herodes auoit commis à l'occision des enfans innocens, ou d'estre trahie des Egyptiens enuers Herodes, estant si longuement entr'eux, comme elle fut, à sçauoir sept années auant que de s'en retourner en Iudée.

S. Matthieu Chap. 2.